

欽定臺規

十七

欽定臺規卷二十五

五城七

禁令

順治十二年題准西山過街塔山玉泉山紅石
山杏子口一帶煤窑永行封禁○康熙五年定
凡邪教惑衆該司坊官不行嚴禁五城御史不
行糾參一併議處○十年覆准凡無業之人在
街道打鼓踢石球者係旗人鞭五十係民人責
二十板○又定凡游手好閒之人輪又舞棍演

弄拳棒。徧游街市。射利惑民。打降賭博。五城等官拏獲。將本犯照違制律治罪。仍枷一月。卽行發落。遞回原籍坊店。寺院房主容留不報。地保人等不行查拏。皆照不應重律治罪。地方文武官失察。照例議處。○又定。凡唱秧歌。婦女及倚民婆。令五城司坊等官。盡行驅逐回籍。毋令潛住京城。若有無籍之徒。容隱在家。因與飲酒者。職官照挾妓飲酒例治罪。其失察地方官。照例議處。○又議准。京師內城不許開設戲館。永行

禁止城外戲館。如有惡棍借端生事。該司坊官查拏。○十五年。禮部題准。寺廟庵觀內。婦女違禁燒香。行走甚多。責令五城查拏。○十八年。議准。凡迎神進香。鳴鑼擊鼓。肆行無忌者。爲首之人。照邪教惑衆律治罪。爲從者。枷三月。責四十板。不准折贖。五城御史及司坊官。不行查拏。分別議處。○二十六年。覆准。無賴狂徒。假藉僧道爲名。或稱祖師降乩。或妄逞邪說。託言前知。或以虛妄之談。蠱惑愚蒙。至有羣相禮拜。甘作徒

從者此等邪教行令五城官嚴行禁止○二十九年覆准凡攙和私錢行使之人查拏被獲係旗人鞭八十係民人責四十板京城外責令五城司坊官京城內責令大宛二縣嚴行查拏若仍有攙和私鑄者將該管官每起罰俸一年○三十年覆准嗣後有造紙牌骰子者嚴行禁止京城現在所有之紙牌骰子俱限一月內銷燬

○三十一年

諭一應馬匹不許宰殺貨賣著永行禁止交與五城等

官嚴察如有宰馬賣者拏送刑部從重治罪○三十
八年覆准令都察院嚴飭五城及司坊官員細
加親查凡年滿書辦卽催回籍儻有潛住在京
及藏頓之家一併從重治罪五城官員如有徇
情容留者照容留廢官之例處分如司坊官有
借端需索指勒等弊或經訪出或係告發將司
坊官嚴加處分○四十年題准凡鳴鑼擊鼓聚
衆燒香男女混雜等弊並扶鸞書符招搖夤緣
之輩及淫詞小說等書俱責令五城司坊官永

行嚴禁○五十二年題准紅石口蝎子山自青
龍橋迤北高兒山等處及楊家頂一帶均關風
水行文五城等官通行嚴禁毋許採砍若有將
禁止之處私行偷砍石料者查拏治罪嗣後如
有修造之處應用石料著欽天監官前往踏看
果係無關地脈之山方許開採○又定西山一
帶密邇京城地方內外官豪勢要之家私自開
窑燒煤鑿山賣石立厰燒灰者問罪枷一月發
邊衛充軍干礙內外官員叅奏提問○五十六

年定錢局收買舊器皿廢銅小民圖利致將制錢燬壞變賣嗣後停其收買行令五城嚴緝燬壞之人治罪○六十一年議准嗣後凡補放官員領憑後令都察院轉行五城司坊官嚴查如有在京藏住躲避地方不依限赴任者卽行報部題叅○雍正元年

諭都察院各衙門募設書辦不過令其繕寫文書收貯檔案但書辦五年方滿爲日旣久熟於作弊甚至已經考滿復改換姓名竄入別部潛蹤淹蹟無所不爲

更有一等名爲缺主。獨掌一司之事。盤踞其中。事無大小。一手握定。而不肖司官。交通賄賂。倚爲心腹。上下朋奸。莫能查究。總之。書辦尚可更換。缺主總無改移。子孫相承。竟成世業。各衙門奸弊叢生。未有不由於缺主者。自今以後。書辦五年考滿。各部院堂司官。查明。勒令回籍候選。逗遛不歸者。著都察院。飭五城司坊官稽察。遣逐。至於缺主。多捐納官職。原有勢力。可以抗違爾衙門職掌糾叅。立刻查明缺主的名。題叅革究。押解回籍。庶作弊之本源永絕。而官方可以

肅清矣○又奉

上諭嗣後缺主與年滿書辦發回原籍之處著各部院一年一次保結具奏儻仍有潛居京師者或經朕聞知或被科道題叅將保結具奏之大臣官員一併治罪尋奏各部院衙門盤踞書吏除拏獲者已遵

旨遞解原籍外仍飭五城司坊官不時稽察如有潛匿京城或遞回私自來京者並拏送刑部治罪嗣後考滿書吏各部院移咨都察院令五城司坊立押回籍毋許逗遛如司坊官不行嚴查一併

采處○又覆准凡有開鵠鶉圈鬪雞坑蟋蟀盆並賭鬪者五城官員嚴行禁止○二年奉

上諭八旗盔甲器械等物曾經禁止質當今再嚴加禁約交與八旗五城以來年爲限儻經察出將五城官員治罪或有不肖之徒藉此訛詐者並應嚴禁○又題准婦人成羣聚會往寺廟進香者令五城嚴禁○又覆准除軍民妻女禁止入廟燒香及扮神賽會外其民間春秋里社祈報者不在此例○又奏准凡坊肆市賣一應淫辭小說在內交

與都察院等衙門轉行所屬官弁嚴禁務按版書盡行銷燬有仍行造作刻印者係官革職軍民杖一百流三千里市賣者杖一百徒三年買看者杖一百該管官弁不行查出按次數分別議處仍不許藉端出首訛詐○三年奉

上諭凡旗員革職離任者皆勒限歸旗康熙二十九年定例漢官革職離任者照旗員例勒限回籍嗣後陸續條陳前後更改且日久廢弛奉行不力嗣後凡漢官革職於任內事結之後卽勒限令其回籍若有逗

遛任所。以及潛住京師。遨遊他省者。照例治罪。其擅自容留之五城。及各地地方官。亦分別處分。至朕從前曾令革職解任官。或有冤抑赴都察院申理。嗣後如有此等人員。著在本地方取具文書。然後來京事竣之後。仍發回原籍。不得藉端留滯。○又奏准。凡妄布邪言。書寫張貼。煽惑人心者。令五城司坊官。不時嚴拏。○又議准。京城安定門外。黃寺前教場。乃操演兵丁。閱看軍器之地。每有路旁掘土爲坯市賣者。令該坊官不時巡查。嚴行禁止。違者

拏送刑部治罪。再入旗教場。皆近城垣。並令一例查禁。○七年奉

上諭。聞民間竟有私宰耕牛之事。著該部步軍統領。順天府府尹。五城御史等。通行曉諭。京城直省。並嚴行查訪。如有違禁私宰。立即鎖拏。按律究治。如該管官不實力嚴查。致有干犯者。定行從重議處。○八年奉
上諭。嗣後內外大小文武官員。帽頂補服坐褥等項。悉照本身現任品級。不得指稱加級。以開僭越之端。在京。著有稽察之責者。嚴行稽察。在外。著該管上司稽

察儻仍復不遵除將本人議處外其失察之員一併處分○又議准嗣後五城地方私立水窩名色分定界趾把持賣水不容他人擔取者照把持行市例治罪該地甲役知有私立水窩不卽舉報者照不首告律分別治罪○又議准五城地方民人有喪葬婚嫁等事須用人夫車轎悉聽本家自行雇覓如有私分地界霸占損擡多取價值不容本家雇覓者立拏枷示兩月杖一百仍令司坊官曉諭永遠遵行該地甲役知有損擡攬

頭不卽舉報者。照不首告律。分別治罪。該司坊官不行嚴禁。照約束不嚴例議處。○又定。凡京城無帖鋪戶。如有私分地界。不令旁人附近開張。及將地界議價若干。方許承頂。至發賣各項貨物。車戶設立名牌。獨自霸攬。不令他人攬運者。各枷兩月。杖一百。○九年。議准。京城鋪戶。有將制錢之邊。磋捶令薄。攪和兌換。鎔化銅末。取利者。五城御史查拏治罪。○十二年。議准。嗣後民間鐵鋪內。私造之烏鎗。及民間違禁隱藏之

烏鎗在京行令五城司坊官勒限兩月嚴行追出交兩翼鐵匠局如逾限不能追出並民間有隱藏不行交出者一經查出將私造隱藏之人並失察之地方官照例分別治罪○十三年奉

高宗純皇帝諭今之書吏卽古之府史胥徒也各部院衙門皆額設召募所以檢收檔案繕寫文書乃役滿之後每復改換姓名竄入別部舞文作弊更有一種缺主已身並未充役居然盤踞都中呼朋引類遇事生風影射撞騙靡所不爲此十數年以前之積弊也